



ბრძანება №01-02/164

**2026-2027 სასწავლო წლიდან ბსუ-ს პირველი საფეხურის საგანმანათლებლო
პროგრამაზე ჩარიცხვის უფლებამოსიერებულ პირთან (სტუდენტთან) გასაფორმებელი
ხელშეკრულების ფორმის დამტკიცების შესახებ**

„უმაღლესი განათლების შესახებ“ საქართველოს კანონის 22-ე მუხლის, წესდების მე-13, 66-70-ე მუხლების, „2026-2027 სასწავლო წლისათვის სახელმწიფოს მიერ დაფუძნებულ უმაღლეს საგანმანათლებლო დაწესებულებაში, უმაღლესი საგანმანათლებლო დაწესებულებისა და საგანმანათლებლო პროგრამების (კურიკულუმების) მიხედვით, ერთიანი ეროვნული გამოცდებით/სამაგისტრო გამოცდებით და ერთიანი ეროვნული გამოცდების/სამაგისტრო გამოცდების გავლის გარეშე მისაღებ სტუდენტთა რაოდენობის დამტკიცების შესახებ“ საქართველოს მთავრობის 2026 წლის 12 თებერვლის №55 დადგენილების, „იმ საგანმანათლებლო პროგრამების (კურიკულუმების) ჩამონათვალის განსაზღვრის შესახებ, რომელთა განხორციელების უფლებაც აქვთ სახელმწიფოს მიერ დაფუძნებულ უმაღლეს საგანმანათლებლო დაწესებულებებს“ საქართველოს მთავრობის 2026 წლის 20 მაისის №212 დადგენილების, „საქართველოს მთავრობის მიერ დაფუძნებული უმაღლესი საგანმანათლებლო დაწესებულების დაფინანსების წესისა და პირობების დადგენის შესახებ“ საქართველოს მთავრობის 2026 წლის 30 ივლისის №359 დადგენილების, ბსუ-ს აკადემიური საბჭოს 2015 წლის 08 ოქტომბრის №111 დადგენილებით დამტკიცებული „სასწავლო პროცესის მარეგულირებელი წესის“, საქართველოს განათლების, მეცნიერებისა და ახალგაზრდობის სამინისტროს წერილის (04/09/2026, MES8260001149118) საფუძველზე

ვ ბ რ ძ ა ნ ე ბ ა :

1. დამტკიცდეს 2026-2027 სასწავლო წლიდან ბსუ-ს პირველი საფეხურის საგანმანათლებლო პროგრამაზე ჩარიცხვის უფლებამოსიერებულ პირთან (სტუდენტთან) გასაფორმებელი ხელშეკრულების ფორმა, წინამდებარე ბრძანების №1 დანართის შესაბამისად.
2. ბრძანება განთავსდეს ბსუ-ს ვებგვერდზე.
3. ბრძანება დაეგზავნოს ბსუ-ს რექტორის მოადგილეებს, ბსუ-ს ხარისხის უზრუნველყოფის სამსახურს, ბსუ-ს ფაკულტეტებს, სასწავლო პროცესის დეპარტამენტს, სამეცნიერო კვლევების სამსახურს, იურიდიულ დეპარტამენტს, საქმისწარმოების სამსახურს (კანცელარია) და საინფორმაციო ტექნოლოგიების სამსახურს.
4. ბრძანება ძალაშია ხელმოწერისთანავე.
5. ბრძანება შეიძლება გასაჩივრდეს კანონმდებლობით დადგენილ ვადაში და წესით ბათუმის საქალაქო სასამართლოში (მისამართი: ქ. ბათუმი, ს. ზუბალაშვილის ქ. №30).

ბსუ-ს რექტორი

ტიტე აროშიძე

„2026-2027 სასწავლო წლიდან ბსუ-ს პირველი საფეხურის საგანმანათლებლო პროგრამაზე ჩარიცხვის უფლებამოსიერებულ პირთან (სტუდენტთან) გასაფორმებელი ხელშეკრულების ფორმის დამტკიცების შესახებ“

ბსუ-ს რექტორის 2026 წლის 04 სექტემბრის №01-02/164 ბრძანების

დანართი №1

ხელშეკრულება №

ქ. ბათუმი

”___”_____” 20_წ.

ერთი მხრივ საჯარო სამართლის იურიდიული პირი – ბათუმის შოთა რუსთაველის სახელმწიფო უნივერსიტეტი (შემდგომში „უნივერსიტეტი“ ან „ბსუ“), წარმოდგენილი უნივერსიტეტის რექტორის მიერ და

მეორე მხრივ - ბსუ-ს პირველი საფეხურის უმაღლეს საგანმანათლებლო პროგრამაზე „.....“ (შემდეგში - „პროგრამა“; კრედიტების რაოდენობა:; ხანგრძლივობა: წელი) ჩარიცხვის უფლებამოსიერებული პირი (შემდეგში „სტუდენტი“)

სტუდენტის კანონიერი წარმომადგენელი (მშობელი/მეურვე)
ვდებთ წინამდებარე ხელშეკრულებას შემდეგზე:

მუხლი 1. ხელშეკრულების საგანი და ზოგადი დებულებები

- 1.1. ხელშეკრულების საგანია ბსუ-ს სტუდენტთან სამართლებრივი ურთიერთობის რეგულაცია, საქართველოს კანონმდებლობის და ბსუ-ს სასწავლო პროცესის მარეგულირებელი წესის შესაბამისად.
- 1.2. ბსუ-ს სამართლებრივი აქტები: „ბსუ-ს სასწავლო პროცესის მარეგულირებელი წესი“, ბსუ-ს ეთიკის კოდექსი, ბსუ-ს შინაგანაწესი, სხვა სამართლებრივი აქტები, რომლებიც ეხება ბსუ-ს სასწავლო პროცესს ან/და აწესრიგებს მხარეთა შორის სამართლებრივ ურთიერთობას, წარმოადგენს წინამდებარე ხელშეკრულების განუყოფელ ნაწილს.
- 1.3. **ბსუ-ს შინაგანაწესით განისაზღვრება** (რეგულირდება): ა) ბსუ-ში შრომითი ურთიერთობის მარეგულირებელი დებულებები (თავი II); ბ) ბსუ-ში სიცოცხლის, ჯანმრთელობისა და შრომითი საქმიანობისათვის უსაფრთხო გარემოს და ჯანსაღი პირობების შესახებ ზოგადი დებულებები, მათ შორის ყოველგვარი დისკრიმინაციის, შევიწროების (მათ შორის სექსუალური შევიწროების) და სიძულვილის ენის გამოყენების აკრძალვის წესი (**თავი III**); გ) უნივერსიტეტის სტუდენტის, პროფესიული სტუდენტის, მსმენელის წახალისება და დისციპლინური პასუხისმგებლობის საკითხები (თავი IV); დ) ბსუ-ს მატერიალურ-ტექნიკური, საინფორმაციო და საბიბლიოთეკო რესურსებით სარგებლობის და ხელმისაწვდომობის წესი (თავი V).
- 1.4. **სტუდენტი ადასტურებს**, რომ წინამდებარე ხელშეკრულების გაფორმებამდე (ხელმოწერამდე) გაეცნო და ბსუ-ში ჩარიცხვისათვის რეგისტრაციის პროცესში ბსუ-ს მიერ დამატებით მიეწოდა ინფორმაცია ამ ხელშეკრულებაში აღნიშნული **ბსუ-ს რეგულაციების შესახებ** (ბსუ-ს ეთიკის კოდექსი, ბსუ-ს შინაგანაწესი (რომელიც სტუდენტთან დადებული ხელშეკრულების განუყოფელ ნაწილად განიხილება), ბსუ-ში პერსონალურ მონაცემთა დაცვის პოლიტიკა, ბსუ-ს სასწავლო პროცესის მარეგულირებელი წესი, ბსუ-ს სტუდენტის გზამკვლევი, სტუდენტის სასწავლო პროცესის შესახებ ინფორმაცია/რეგულაციები სტუდენტის უფლება-მოვალეობების, აკადემიური და ადმინისტრაციული რეგისტრაციის, სტუდენტის სტატუსის მოპოვების, შეჩერების, შეწყვეტის, აღდგენის, კრედიტების აღიარების, მობილობის

პროცედურების და სტუდენტური სერვისების შესახებ), რომლებიც განთავსებულია ბსუ-ს ოფიციალურ ვებგვერდზე - www.bsu.edu.ge (ველში „იურიდიული ცნობარი“ და ველში - „სწავლა“ - „სტუდენტის გზამკვლევი“).

- 1.5. სასწავლო სემესტრის დაწყებისა და დასრულების თარიღი (აკადემიური კალენდარი), ასევე აკადემიური და ადმინისტრაციული რეგისტრაციის ვადები, განისაზღვრება ბსუ-ს სამართლებრივი აქტებით, რომელიც ქვეყნდება ბსუ-ს ოფიციალურ ვებგვერდზე (ველში - „სწავლა“ - „აკადემიური კალენდარი“).
- 1.6. ბსუ-ს სტუდენტის სწავლის საფასურის გადახდის წესის შესახებ ინფორმაცია/რეგულაცია/სამართლებრივი აქტები განთავსებულია ბსუ-ს ვებგვერდზე (ველში - „სტუდენტის გზამკვლევი“).

მუხლი 2. მხარეთა უფლება-მოვალეობები

2.1. სტუდენტის უფლებებია:

- ა) უნივერსიტეტისაგან მიიღოს საგანმანათლებლო პროგრამის შესაბამისი და ხარისხიანი საგანმანათლებლო მომსახურება, ასევე მონაწილეობა მიიღოს სამეცნიერო-კვლევით საქმიანობაში;
- ბ) სხვა სტუდენტებთან თანაბარ პირობებში ისარგებლოს უნივერსიტეტის ინფრასტრუქტურით, მატერიალურ-ტექნიკური, საბიბლიოთეკო, საინფორმაციო და სხვა საშუალებებით, ჯანმრთელობისა და სიცოცხლისათვის უსაფრთხო გარემოში;
- გ) მოითხოვოს ცოდნის სამართლიანი შეფასება, გაასაჩივროს მიღებული შეფასების შედეგები ბსუ-ს სასწავლო პროცესის მარეგულირებელი წესით/საგამოცდო ინსტრუქციით დადგენილ ვადაში და წესით;
- დ) საქართველოს კანონმდებლობის და ბსუ-ს სამართლებრივი აქტების შესაბამისად შეიჩეროს ან შეიწყვიტოს სტუდენტის სტატუსი, ისარგებლოს მობილობის უფლებით;
- ე) საყოველთაო, პირდაპირი და თანასწორი არჩევნების საფუძველზე, ფარული კენჭისყრით, აირჩიოს ან/და არჩეულ იქნეს სტუდენტურ თვითმმართველობაში და უნივერსიტეტისა და ფაკულტეტის მართვის ორგანოში.
- ვ) მონაწილეობა მიიღოს პროგრამის განმახორციელებელი პერსონალის შეფასებაში, ასევე სასწავლო პროცესის და უნივერსიტეტის მიერ შეთავაზებული სხვა სერვისების შეფასებაში;
- ზ) ისარგებლოს საქართველოს კანონმდებლობით, „უმაღლესი განათლების შესახებ“ საქართველოს კანონით და კანონქვემდებარე სამართლებრივი აქტებით, ბსუ-ს წესდებით და უნივერსიტეტის სხვა სამართლებრივი აქტებით დაწესებული სტუდენტის უფლებებით.

2.2. სტუდენტი ვალდებულია:

- ა) შეასრულოს შესაბამისი საგანმანათლებლო პროგრამის მოთხოვნები, დადგენილ ვადაში გაიაროს აკადემიური რეგისტრაცია (დაარეგისტრიროს სასწავლო კურსები/კომპონენტები) და შეასრულოს შესაბამისი სასწავლო კურსების (კომპონენტების) სილაბუსებით გათვალისწინებული აკადემიური აქტივობა/სამუშაო;
- ბ) წინამდებარე ხელშეკრულების, საქართველოს კანონმდებლობისა და ბსუ-ს სამართლებრივი აქტების შესაბამისად, ბსუ-ს რექტორის ბრძანებით განსაზღვრულ ვადაში გაიაროს ადმინისტრაციული რეგისტრაცია - გადაიხადოს სწავლის საფასური (თუკი ექვემდებარება ადმინისტრაციული რეგისტრაციის გავლას);
- გ) სისტემატურად ისარგებლოს „სასწავლო პროცესის მართვის ელექტრონული სისტემით“/„სტუდენტური პორტალით“, რომლის საშუალებით სტუდენტებს მიეწოდება უნივერსიტეტის შეტყობინებები/ინფორმაცია სასწავლო პროცესისა და გამოცემული სამართლებრივი აქტების თაობაზე;
- დ) უნივერსიტეტთან კომუნიკაციისათვის (ინფორმაციის, ცნობების მიღება-მოთხოვნისათვის) ისარგებლოს სტუდენტური პორტალით და პირადი მონაცემების ცვლილების შემთხვევაში

წარმოადგინოს ინფორმაცია სტუდენტურ პორტალზე/ელექტრონულ სისტემაში, მის პირად პროფილში ასახვის მიზნით;

ე) გაეცნოს უნივერსიტეტის სამართლებრივ აქტებს, რომლებიც გამოქვეყნდება ბსუ-ს ვებგვერდის (www.bsu.edu.ge) **ველებში**: „იურიდიული ცნობარი“, „სტუდენტის გზამკვლევი“, ასევე განთავსდება შესაბამისი ფაკულტეტის საინფორმაციო დაფაზე/სასწავლო პროცესის მართვის ელექტრონულ სისტემაში/სტუდენტურ პორტალზე/საქმისწარმოების სამსახურთან (კანცელარია) არსებულ საინფორმაციო დაფაზე;

ვ) გაუფრთხილდეს უნივერსიტეტის ქონებას, არ დაუშვას უნივერსიტეტის შენობის, სასწავლო ინვენტარის, კომპიუტერული ტექნიკის და უნივერსიტეტის მფლობელობაში არსებული სხვა ქონების დაზიანება ან/და უდიერად მოპყრობა; დროულად დააბრუნოს უნივერსიტეტის ბიბლიოთეკიდან გატანილი წიგნები და მასალები და დაიცვას „ბსუ-ს ბიბლიოთეკით სარგებლობის წესის“ მოთხოვნები;

ზ) ჯეროვნად შეასრულოს ამ ხელშეკრულების, საქართველოს კანონმდებლობის, ბსუ-ს წესდების, ეთიკის კოდექსის, შინაგანაწესის, სასწავლო პროცესის მარეგულირებელი წესის, აკადემიური კეთილსინდისიერების დაცვის შესახებ საუნივერსიტეტო რეგულაციის და უნივერსიტეტის სხვა რეგულაციების მოთხოვნები.

2.3. უნივერსიტეტი ვალდებულია:

ა) უზრუნველყოს სტუდენტი საგანმანათლებლო პროგრამის შესაბამისი და ხარისხიანი საგანმანათლებლო მომსახურებით და სამეცნიერო კვლევაში მონაწილეობით;

ბ) უზრუნველყოს სტუდენტის მიერ უნივერსიტეტის სხვა სტუდენტებთან თანაბარ პირობებში უნივერსიტეტის ინფრასტრუქტურით, მატერიალურ-ტექნიკური, საბიბლიოთეკო, საინფორმაციო და სხვა საშუალებებით სარგებლობა, ჯანმრთელობისა და სიცოცხლისათვის უსაფრთხო საუნივერსიტეტო გარემოში;

გ) სტუდენტის ცოდნა შეაფასოს სამართლიანად და უზრუნველყოს მის მიერ მიღებული შეფასების შედეგების გასაჩივრების უფლების რეალიზაცია;

დ) უზრუნველყოს სტუდენტი პროგრამის განმახორციელებელი პერსონალის, ასევე სასწავლო პროცესის და უნივერსიტეტის მიერ შეთავაზებული სხვა სერვისების შეფასებაში მონაწილეობის უფლებით;

ე) არ დაუშვას სტუდენტის დისკრიმინაცია, ასევე უზრუნველყოს სტუდენტის პერსონალური ინფორმაციის დაცვა, საქართველოს კანონმდებლობის შესაბამისად;

ვ) უზრუნველყოს და ხელი შეუწყოს სტუდენტის მიერ საქართველოს კანონმდებლობით, „უმაღლესი განათლების შესახებ“ საქართველოს კანონისა და მისგან გამომდინარე კანონქვემდებარე აქტებით, ასევე ბსუ-ს წესდებით, სასწავლო პროცესის მარეგულირებელი წესით და სხვა სამართლებრივი აქტებით დაწესებული სტუდენტის უფლებებით სარგებლობას.

2.4. უნივერსიტეტი უფლებამოსილია:

ა) საგანმანათლებლო პროგრამის შესაბამისად დაგეგმოს სასწავლო პროცესი, განსაზღვროს სასწავლო წლის კალენდარი, აკადემიური და ადმინისტრაციული რეგისტრაციის ვადები;

ბ) სტუდენტის შესახებ გამოსცეს სამართლებრივი აქტები საქართველოს კანონმდებლობის, ბსუ-ს წესდების, ეთიკის კოდექსის, შინაგანაწესის, სასწავლო პროცესის მარეგულირებელი წესის, ბსუ-ს სხვა რეგულაციების და წინამდებარე ხელშეკრულების პირობების დაცვით.

მუხლი 3. სწავლის საფასურის ოდენობა, გადახდის წესი და სხვა პირობები

3.1. სტუდენტის სწავლების ერთი წლის საფასური განისაზღვრება საქართველოს მთავრობის 2026 წლის 30 ივლისის №359 დადგენილების დანართით დამტკიცებული „საქართველოს მთავრობის მიერ დაფუძნებული უმაღლესი საგანმანათლებლო დაწესებულებების დაფინანსების წესისა და პირობების“ შესაბამისად, „საქართველოს მთავრობის მიერ დაფუძნებულ უმაღლეს საგანმანათლებლო დაწესებულებაში აკადემიური უმაღლესი განათლების პირველ და მეორე

საფეხურებზე საგანმანათლებლო პროგრამების ღირებულების” მიხედვით, რაც ყოველი სასწავლო წლისათვის იყოფა ორ სემესტრზე (მათ შორის: ა) 2026-2027 სასწავლო წლის პირველი სემესტრისათვის შეადგენს - 1125 ლარს; ბ) 2026-2027 სასწავლოს წლის მეორე სემესტრისა და ყოველი მომდევნო სემესტრისათვის შეადგენს ლარს).

3.2. შესაბამის პროგრამაზე ჩარიცხვიდან **პროგრამის ხანგრძლივობის განმავლობაში** სტუდენტი სრულად თავისუფლდება სემესტრული გადასახადისგან, გარდა ამ მუხლის 3.4. პუნქტით გათვალისწინებული შემთხვევისა.

3.3. ამ მუხლის 3.2. პუნქტით გათვალისწინებულ ვადაში:

ა) **არ ჩაითვლება შემოდგომის სემესტრი**, თუ სტუდენტს **სტატუსი შეჩერებული ჰქონდა** შესაბამისი წლის 15 ნოემბრის მდგომარეობით და **გაზაფხულის სემესტრი**, თუ სტუდენტს სტატუსი შეჩერებული ჰქონდა შესაბამისი წლის 01 აპრილის მდგომარეობით;

ბ) თუ სახეზე არ არის ამავე პუნქტის „ა“ ქვეპუნქტით გათვალისწინებული შემთხვევა, **ჩაითვლება სასწავლო სემესტრი**, რომლის განმავლობაშიც სტუდენტს შეჩერებული ჰქონდა დამსახურებაზე დაფუძნებული სახელმწიფო დაფინანსება ამ მუხლის 3.4. პუნქტის შესაბამისად.

3.4. **მესამე და ყოველი მომდევნო სასწავლო სემესტრისათვის**, სტუდენტი ვალდებულია გადაიხადოს ამ მუხლის 3.1. პუნქტით განსაზღვრული თანხის 50%, თუ მან წინა სასწავლო სემესტრში (რომლის განმავლობაშიც მას ჰქონდა აქტიური სტუდენტის სტატუსი) ვერ დააგროვა შესაბამისი საგანმანათლებლო პროგრამით სრული სემესტრული დატვირთვისთვის ან სტუდენტისათვის ინდივიდუალურად შედგენილი გეგმით (ასეთის არსებობის შემთხვევაში) **გათვალისწინებული კრედიტების რაოდენობის მინიმუმ 80%.**

3.5. **ამ მუხლის 3.4. პუნქტი არ ვრცელდება სტუდენტზე**, თუ ის მიეკუთვნება საქართველოს მთავრობის 2026 წლის 30 ივლისის №359 დადგენილების დანართით დამტკიცებული „საქართველოს მთავრობის მიერ დაფუძნებული უმაღლესი საგანმანათლებლო დაწესებულებების დაფინანსების წესისა და პირობების“ მე-8 მუხლის მე-4 პუნქტით გათვალისწინებულ **საგამონაკლისო პირთა წრეს.**

3.6. ამ მუხლის 3.4. პუნქტით გათვალისწინებული პირობის დადგომისას, სტუდენტის მიერ **სწავლის საფასურის შესაბამისი სემესტრისათვის** ადმინისტრაციული რეგისტრაციის დადგენილ ვადაში **გადაუხდელობის შემთხვევაში**, უნივერსიტეტი უფლებამოსილია არ მისცეს სტუდენტს სასწავლო გეგმით გათვალისწინებულ საგნებზე რეგისტრაციის უფლება და შეუჩეროს სტუდენტის სტატუსი. სტატუსის აღდგენის განხილვა ხდება სტუდენტის მიერ ფინანსური დავალიანების სრულად დაფარვის შემდგომ, **ბსუ-ს სასწავლო პროცესის მარეგულირებელი წესის შესაბამისად.**

3.7. ამ მუხლის 3.4. პუნქტით გათვალისწინებული პირობის დადგომისას, სტუდენტი უფლებამოსილია, ყოველი მომდევნო სემესტრიდან აღიდგინოს სრული დაფინანსება, რისთვისაც ის ვალდებულია, წინა სემესტრში დააგროვოს სრული სემესტრული დატვირთვისთვის ან სტუდენტისათვის ინდივიდუალურად შედგენილი გეგმით (ასეთის არსებობის შემთხვევაში) გათვალისწინებული კრედიტთა **რაოდენობის 100%.** ამ პუნქტით გათვალისწინებულ შემთხვევაში, სტუდენტი კვლავ სრულად გათავისუფლდება ყოველი მომდევნო სემესტრის გადასახადისგან, ამ მუხლის 3.2. პუნქტით დადგენილი ვადით (პროგრამის ხანგრძლივობა);

3.8. თუ სტუდენტმა შესაბამისი პროგრამის დამთავრებისათვის საჭირო კრედიტების რაოდენობა ვერ დააგროვა ამ მუხლის 3.2. პუნქტით დადგენილ ვადაში (პროგრამის ხანგრძლივობა), სტუდენტი ვალდებული იქნება საკუთარი სახსრებით სრულად (100%) დაფაროს ყოველი მომდევნო სასწავლო სემესტრის საფასური, რომელიც გამოითვლება უნივერსიტეტში შესაბამის სასწავლო წელს ამავე საგანმანათლებლო პროგრამის სტუდენტისათვის დადგენილი სემესტრული სწავლის საფასურის შესაბამისად. აღნიშნული

გარემოების დადგომის შემთხვევაში, მხარეთა შორის გაფორმდება ახალი ხელშეკრულება/ შეთანხმება.

მუხლი 4. ხელშეკრულების მოქმედების ვადა, სტუდენტის სტატუსის შეწყვეტა და შეჩერება

4.1. წინამდებარე ხელშეკრულება ძალაშია **2026-2027 სასწავლო წლის შემოდგომის სემესტრიდან** (28/09/2026 წ.) მოქმედებს ამ პროგრამაზე ბსუ-ს სტუდენტის სტატუსის შეწყვეტამდე პერიოდში;

4.2. სტუდენტისათვის სტატუსის შეწყვეტის შემთხვევაში მხარეები ვალდებული არიან სრულად შეასრულონ სტატუსის შეწყვეტამდე წარმოშობილი ვალდებულებები.

4.3. უნივერსიტეტის **სტუდენტის სტატუსის შეწყვეტის საფუძვლებია:**

ა) პირადი განცხადება;

ბ) შესაბამისი საგანმანათლებლო პროგრამის დასრულება (აკადემიური ხარისხის მინიჭება);

გ) ბსუ-ს სასწავლო პროცესის მარეგულირებელი წესით გათვალისწინებული შემთხვევა, შესაბამისი საგანმანათლებლო პროგრამით გათვალისწინებული მოთხოვნების შეუსრულებლობა;

დ) ერთი და იმავე სასწავლო კურსის სამჯერ მოსმენა და კრედიტის ვერ მიღება (სამჯერ შეფასების „ჩაჭრა“ – F მიღება);

ე) ჯამში 5 წლის განმავლობაში სტუდენტის სტატუსის შეჩერება, გარდა კანონმდებლობით გათვალისწინებული შემთხვევისა;

ვ) გარდაცვალება;

ზ) საქართველოს კანონმდებლობით, უნივერსიტეტის წესდებით, ეთიკის კოდექსით და შინაგანაწესით განსაზღვრული სხვა შემთხვევები.

4.4. სტუდენტისათვის სტატუსის შეჩერების შემთხვევაში, მხარეები თავისუფლდებიან წინამდებარე ხელშეკრულებით გათვალისწინებული უფლება-მოვალეობების შესრულებისაგან, თუმცა აღნიშნული არ ათავისუფლებს მხარეებს სტატუსის შეჩერებამდე წარმოშობილი ვალდებულების შესრულებისაგან.

4.5. **სტუდენტის სტატუსის შეჩერების საფუძვლებია:**

ა) პირადი განცხადება (მიზეზის მითითების გარეშე);

ბ) აკადემიური რეგისტრაციის (სასწავლო პროცესის ელექტრონულ სისტემაში რეგისტრაციის) გაუვლელია;

გ) ადმინისტრაციული რეგისტრაციის გაუვლელია (თუკი შესაბამის სემესტრში სტუდენტი ექვემდებარება ადმინისტრაციული რეგისტრაციის გავლას);

დ) ორსულობა, მშობიარობა, ბავშვის მოვლა ან ჯანმრთელობის მდგომარეობის გაუარესება;

ე) უცხო ქვეყანაში, უმაღლეს საგანმანათლებლო დაწესებულებაში სწავლა (გარდა გაცვლითი საგანმანათლებლო პროგრამის ფარგლებში სწავლისა);

ვ) საქართველოს კანონმდებლობით, უნივერსიტეტის წესდებით და სხვა აქტებით განსაზღვრული შემთხვევები.

4.6. უნივერსიტეტის სტუდენტის სტატუსის შეჩერების მოთხოვნით სტუდენტმა განცხადებით უნდა მიმართოს რექტორს სასწავლო პროცესის დაწყებიდან **არაუგვიანეს 15 დღისა**. ხანგრძლივი და მძიმე ავადმყოფობის ან სხვა შემთხვევაში, როცა დოკუმენტურად დასტურდება სტუდენტის სასწავლო პროცესში მონაწილეობის შეუძლებლობა, გამონაკლისი შესაძლოა დადგინდეს რექტორის ბრძანებით, ბსუ-ს სასწავლო პროცესის მარეგულირებელი წესის შესაბამისად.

4.7. სტუდენტის სტატუსის მოპოვების, სტუდენტის სტატუსის შეჩერების/სასწავლო პროცესში დაბრუნების, სტუდენტის სტატუსის შეწყვეტის პროცედურა და სასწავლო პროცესთან დაკავშირებული სხვა რეგულაცია, დადგენილია საქართველოს კანონმდებლობით და ბსუ-ს წესდების შესაბამისად შემუშავებული „ბსუ-ს სასწავლო პროცესის მარეგულირებელი წესით“ (განთავსებულია ბსუ-ს ვებგვერდზე „სტუდენტის გზამკვლევაში“, სტუდენტთან დაკავშირებულ სხვა რეგულაციებთან ერთად).

მუხლი 5. პერსონალური მონაცემების დამუშავებაზე სტუდენტის წერილობითი თანხმობის განაცხადი

5.1. სტუდენტი (მონაცემთა სუბიექტი) აცხადებს ინფორმირებულ თანხმობას, „პერსონალურ მონაცემთა დაცვის შესახებ“ საქართველოს კანონის, „ბსუ-ში პერსონალურ მონაცემთა დაცვის პოლიტიკის“, ბსუ-ს საქმისწარმოების ინსტრუქციის და „სტუდენტთა ელექტრონული სერვისების ადმინისტრირების წესის“ მოთხოვნათა დაცვით დამუშავდეს მისი პერსონალური მონაცემები (სახელი, გვარი, პირადი ნომერი, ელფოსტის მისამართი, ტელეფონის ნომერი, რეგისტრაციის/საცხოვრებელი მისამართი, ფოტო) და ბსუ-ს სასწავლო პროცესში მონაწილეობის მონაცემები (დასწრების, შეფასების შედეგების, დიპლომის/დიპლომის დანართის დამზადებისა და გაცემის შესახებ), აგრეთვე განსაკუთრებული კატეგორიის მონაცემები (ჯანმრთელობის მდგომარეობის შესახებ), საგანმანათლებლო მომსახურების გაწევასთან დაკავშირებული სამართლებრივი ურთიერთობის მიზნებისათვის (მათ შორის სტუდენტურ პორტალზე/სასწავლო პროცესის მართვის ელექტრონულ სისტემაში განთავსება და სხვა).

5.2. მონაცემთა სუბიექტი ადასტურებს, რომ ინფორმირებულია ბსუ-ს ტერიტორიაზე (შესასვლელები, გარე პერიმეტრი, ეზო, დერეფნები, კიბის უჯრედები, კომპიუტერული კლასები, ბიბლიოთეკა და ლაბორატორიები) უსაფრთხოებისა და ქონების დაცვის მიზნით მიმდინარე 24-საათიანი ვიდეომონიტორინგის შესახებ, ასევე საგამოცდო სივრცეებში – ვიდეომონიტორინგის გამოცდების/ტესტირების პერიოდში განხორციელების თაობაზე, „ბსუ-ში პერსონალურ მონაცემთა დაცვის პოლიტიკის“ შესაბამისად.

5.3. მონაცემთა სუბიექტი ასევე აცხადებს თანხმობას, რომ ბსუ-ს მიერ ორგანიზებულ ღონისძიებებზე გადაღებული მისი ფოტო/ვიდეო მასალა, შესაძლოა გამოყენებულ იქნეს უნივერსიტეტის ვებგვერდზე, სოციალურ ქსელებსა და სხვა საინფორმაციო რესურსებში. მონაცემთა სუბიექტი აცხადებს წინასწარ თანხმობას მისი პერსონალური მონაცემების გადაცემაზე შესაბამისი სახელმწიფო უწყებების, ავტორიზაცია/აკრედიტაციის პროცესში ჩართული ორგანიზაციებისათვის, თუ აღნიშნული აუცილებელია უნივერსიტეტის სამართლებრივი ვალდებულებების შესასრულებლად ან ბსუ-ს საგანმანათლებლო საქმიანობის ლეგიტიმური მიზნების მისაღწევად.

5.4. მონაცემთა სუბიექტი აცხადებს, რომ ინფორმირებულია მისი პერსონალური მონაცემების დამუშავებისას ბსუ უზრუნველყოფს შესაბამის ორგანიზაციულ და ტექნიკურ ზომებს მონაცემთა უსაფრთხოების დაცვის მიზნით. სტუდენტი (მონაცემთა სუბიექტი) ადასტურებს (აცხადებს), რომ ინფორმირებულია მისი პერსონალური მონაცემების შენახვის ვადების თაობაზე, კერძოდ, მისი პერსონალური მონაცემები დამუშავდება და შეინახება სტუდენტის სასწავლო პროცესთან დაკავშირებული (საგანმანათლებლო მომსახურება) სამართლებრივი ურთიერთობის პროცესში მონაცემების დამუშავების ლეგიტიმური მიზნის მისაღწევად აუცილებელი დროით, ბსუ-ს სამართლებრივი აქტებით და საქართველოს კანონმდებლობით განსაზღვრული ვადით და წესით.

5.5. სტუდენტი (მონაცემთა სუბიექტი) აცხადებს, რომ ინფორმირებულია მონაცემთა სუბიექტის უფლებების შესახებ, რაც მათ შორის გულისხმობს უფლებამოსილებას, მიიღოს ინფორმაცია მის შესახებ ბსუ-ს მიერ დამუშავებულ მონაცემებზე, მოითხოვოს მათი გასწორება, განახლება, დამატება, დაბლოკვა, წაშლა ან განადგურება, თუ აღნიშნული მონაცემები არასრულია, არაზუსტია, არ არის განახლებული ან მათი შეგროვება და დამუშავება განხორციელდა „პერსონალურ მონაცემთა დაცვის შესახებ“ საქართველოს კანონის მოთხოვნათა დარღვევით.

5.6. სტუდენტი (მონაცემთა სუბიექტი) აცხადებს, რომ ინფორმირებულია იმის შესახებ, რომ მას აქვს უფლება ნებისმიერ დროს, ყოველგვარი განმარტების გარეშე გამოიხმოს **წინამდებარე ხელშეკრულებით გაცხადებული** თანხმობა, რის შემდეგაც ბსუ შეწყვეტს მონაცემთა დამუშავებას, თუ არ არსებობს კანონმდებლობით გათვალისწინებული დამუშავების სხვა საფუძველი.

5.7. სტუდენტი (მონაცემთა სუბიექტი) აცხადებს, რომ ინფორმირებულია იმის შესახებ, რომ სტუდენტის პერსონალური მონაცემების დამუშავების შესახებ სრული ინფორმაცია განთავსებულია ბსუ-ს ვებგვერდზე (ველში „სწავლა“ განთავსებულ „სტუდენტთა გზამკვლევში“ (თავი: „სტუდენტის უფლებები, ვალდებულებები და პერსონალური მონაცემების დამუშავება“).

5.8. მონაცემთა სუბიექტი აცხადებს, რომ ინფორმირებულია პერსონალურ მონაცემებთან დაკავშირებულ ნებისმიერ საკითხზე შეუძლია მიმართოს ბსუ-ს პერსონალურ მონაცემთა დაცვის ოფიცერს.

მუხლი 6. დასკვნითი დებულებები

6.1. ამ ხელშეკრულებაში ცვლილება ან დამატება შეიძლება შეტანილ იქნეს მხოლოდ მხარეთა წერილობითი შეთანხმებით. ცვლილებები ან დამატებები ამ ხელშეკრულების განუყოფელი ნაწილია და ძალაში შედის მხოლოდ მხარეთა ხელმოწერის შემდეგ.

6.2. საკითხები, რომლებსაც არ აწესრიგებს ეს ხელშეკრულება, რეგულირდება საქართველოს კანონმდებლობის შესაბამისად.

6.3. მხარეთა შორის სადავო საკითხები მოგვარდება შეთანხმებით, ხოლო შეთანხმების მიუღწევლობის შემთხვევაში - სასამართლო წესით, საქართველოს კანონმდებლობის შესაბამისად.

6.4. ხელშეკრულება შედგენილია ორი თანაბარი იურიდიული ძალის მქონე ეგზემპლარად. თითოეული ეგზემპლარი გადაეცემა ხელშეკრულების თითოეულ მხარეს.

6.5. ამ ხელშეკრულებაში აღნიშნული რომელიმე რეკვიზიტის შეცვლის შემთხვევაში, შესაბამისი მხარე ვალდებულია უმოკლეს ვადაში წერილობით აცნობოს ხელშეკრულების მეორე მხარეს.

6.6. მხარეთა რეკვიზიტები/საკონტაქტო ინფორმაცია და ხელმოწერები:

„ბსუ“

საჯარო სამართლის იურიდიული პირი -
ბათუმის შოთა რუსთაველის სახელმწიფო
უნივერსიტეტი

(მისამართი: ქ. ბათუმი, რუსთაველის /
ნინოშვილის ქ. №32/35;

ბსუ-ს ვებგვერდი - www.bsu.edu.ge.

ელფოსტა: info@bsu.edu.ge

ბსუ-ს რექტორი

(ხელმოწერა)

„სტუდენტი“

სახელი, გვარი:
პირადობის მოწმობის №
პირადი №
ფაქტობრივი
მისამართი
რეგისტრაციის
მისამართი
ტელეფონი
ელფოსტა

(სტუდენტის ხელმოწერა)

სტუდენტის კანონიერი წარმომადგენელი
(მშობელი/მეურვე)

სახელი, გვარი:
პირადობის მოწმობის №.....

(ხელმოწერა)